

UKA 2025/87: Utoqqaat pillugit siunnersuisooqatigiinnik kommunit tamarmik kingusinnerpaamik ukiakkut ataatsimiinnermi 2027-mi peqalernissaannut Naalakkersuisut inatsimmik siunnersuuteqarnissaannut peqqunneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens NapâtôK', Naleraq)

UKA 2025/93: Utoqqarnut inatsimmik ataatsimik pilersitsisoqarnissaannik Naalakkersuisut peqqunneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mariane Paviassen Jensen, Inuit Ataqatigiit)

Akissuteqaat

(Isumaginninnermut, Suliffeqarnermut, Nunamullu Namminermut Avatangiisinullu Naalakkersuisoq)

Siullermeerneqarnera

Naalakkersuisut siunnersuummut siunnersuuteqartoq qujaffigerusuppaat.

Naalakkersuisooqatigiinnermut isumaqatigiisummi takuneqarsinnaavoq, Naalakkersuisut utoqqaat pillugit inatsimmik suliaqartoqassasoq kissaatigigaat. Tamanna allannguuteqanngilaq. Inuit Ataqatigiit, siunnersuuteqartup tunuliaqutai, naalakkersuisooqatigiinnermut isumaqatigiisummi atsiqataapput.

Utoqqaat pitsaasumik sullinneqartariaqarput ulluinnarnilu utoqqaat qungujulaffigineqarlutik naapinneqartariaqarput. Naalakkersuisut anguniagaraat, utoqqaat pillugit inatsit utoqqarnut suliaasaqarfimmik nukittorsaassasoq minnerunngitsumillu suliaasaqarfiup ingerlanneqarnera siunissami qulakkeerlugu, taamaalillutik kommunit utoqqaat amerliartortut sullinneqarnissaat piareersimaffigissammassuk.

Taamaattumik Naalakkersuisut utoqqaat pillugit inatsimmik ataatsimoortumik susasaqartut ulluinnarni suliaqartussat suleqatigalugit suliaqarneq aallartippaat. Utoqqaat pillugit inatsisip siunertaraa, utoqqaat pisinnaatitaaffiisa nukittorsarnissaat utoqqaallu pillugit inatsimmik ataatsimoortumik pilersitsinissaq. Siunertaavoq utoqqaat pillugit inatsimmik ataatsimoortumik suliaqarnissaq, kommuninut utoqqarnut suliaasaqarfimmik ajornannginnerusumik aqutsisinnaalersinnissaat anguniarlugu aamma utoqqaat pisinnaatitaaffii ulluinnarnilu ikiorneqarnissamut periarfissai pillugit ersarinnerulersitsisussaq.

Naalakkersuisut kommunit aamma Namminersorlutik Oqartussat akornanni isumaginninnermut suleqatigiinnissamut oqallittarfimmik aallartitserperput, oqallittarfiup isumaginninnermut suliaasaqarfimmi suleqatigiinnissaq suliniutinillu ineriartortitsinissaq siunertarivaa. Pingaaruteqarpoq Namminersorlutik Oqartussat kommunillu akornanni suleqatigiinnerup qaninnerusup pilersinneqarnissaa. Taamaalilluni utoqqaat tapersersorneqarnissaat pillugu inatsimmik nutaamik ineriartortitsineq kommuninik qanimut suleqatigiissutigineqarpoq.

Naalakkersuisut kommunini tamani utoqqaat siunnersuisoqatigeeqarnissaa pillugu siunnersuuteqartup kissaataa tapersersorpaat. Utoqqaat inuiaqatigiinni tusaaneqarnissaat oqaaseqarsinnaanissaallu pingaartuuvoq. Utoqqaat kommunini utoqqaat siunnersuisoqatigiit

sulineratigut najukkami pissutsit ineriartornerannut sunniinissamut tapersiinissamullu periarfissinneqarnissaat aamma pingaartuuvoq.

Kommunini utoqqaat siunnersuisoqatigiivini pilersitsinissamut ingerlatsinissamullu kommuninut pisussaaffiliisumik inatsisilik atuuttunik soqanngilaq. Taamaattoq kommunit arlallit utoqqaat siunnersuisoqatigiivini ukiuni arlalinni atuutereersunik pilersitsereerput. Maannamut kommunalbestyrelset ataasiakkaat siunnersuisoqatigiinnik pilersitsissanerlutik namminneq aalajangersinnaavaat. Tamanna aamma isumaqarpoq, utoqqaat siunnersuisoqatigiit ilusiligaanerat siunertaallu kommunimiit kommunimut nikerarsinnaasut.

Naalakkersuisut utoqqaat siunnersuisoqatigiivini “utoqqaat tapersersorneqarnissaat pillugu inatsisissami” ilanngullugit suliarineqassasut isumaliuteqarfigereerpaat. Tamanna inatsimmut missingiummi, Naalakkersuisuusimasut 2024-mi ukiakkut ataatsimiinnermi saqqummiussaanni, ilaareerpoq.

Naalakkersuisunut pingaaruteqarpoq, utoqqaat tapersersorneqarnissaat pillugu inatsisip nutaap utoqqarnut sullissinerup nutaanik pitsaassusilernissanut anguniagaqarnera. Peqatigalugu aamma pingaaruteqarpoq, inatsisip piviusorsiortuunissaa nalinginnaasumillu suliarineqarsinnaanera. Inatsimmik pitsaasumik suliaqarneq iluaqutaasinnaannngilaq, nalinginnaasumik suliarineqarsinnaanngippat. Taamaattumik Naalakkersuisut kommuninik aamma kommunini suliamut ilisimasalinnik ulluinnarni utoqqartatsinnik ikiuisartunik qanimut suleqateqarput.

Utoqqaat tapersersorneqarnissaat pillugu inatsit nutaaq Kalaallit Nunaanni siunissamut pingaaruteqarpoq. Utoqqarnut suliaasaqarfimmut atasumik annertuunik aningaasartuuteqarpoq, aningaasartuutillu taakku ukiuni aggersuni annertuumik amerleriartussaallutik. Taamaattumik aamma pingaaruteqarpoq, inatsit kommuninik susasaqartunillu allanik qanimut suleqatigiinnikkut pitsaasumik suliarineqarpat.

Naalakkersuisut inatsit Inatsisartunut saqqummiunissaannut qilanaarput.

Tamanna tunngavigalugu Naalakkersuisut allannguutissatut siunnersuummik saqqummiussippat:

”Utoqqaat tapersersorneqarnissaat pillugu inatsimmik nutaamik Naalakkersuisut peqquneqassasut 2027-mi Inatsisartut ukiakkut ataatsimiinneranni saqqummiusseqqullugit. Utoqqaat tapersersorneqarnissaat pillugu inatsisissami utoqqaat siunnersuisoqatigiit inatsisiliornermut ilanngullugu suliarineqarsinnaaneranut periarfissap misissorneqarnissaanik Naalakkersuisut peqquneqassasut. Aningaasaqarnikkut kingunerisassai pisariaqartitsinerlu kommunit peqatigalugit naleqqussarneqassapput”.